

四庫全書

子部

欽定四庫全書

太平御覽卷二百六

宋 李昉等 撰

職官部四

總叙三師

太師

太傅

太保

太宰

總叙三公

總叙三師

六典曰三師訓導之官也蓋天子所法師大抵無所統職然非道德崇重則不居其位無其人則闕之

尚書云成王黜殷滅淮夷歸豐作周官立太師太傅太保茲惟三公論道經邦變理陰陽孔安國曰師天子所師法傅上相天子保者安天子於德義禮記云設四輔及三公不必備唯其人語使能也

六典云漢承秦制不置三公漢末以大司馬大司徒大司空為三公師傅之官位在三公上後漢因之師傅尊

號曰上公置府僚魏晉江左亦然後魏太師太傅太保
尊號曰三師後周又為三公隋氏又為三師

太師

毛詩曰尹氏太師維周之氏秉國之均四方是維天子

是毗俾民不迷

箋云毗輔也言尹氏居太師之官持國政之平維制四方

又曰維師尚父時惟鷹揚諒彼武王肆伐大商

大戴禮曰天子不論於先聖王之德不知君國畜民之
道不見禮儀之正不察應事之理不博古之典傳不嫻

威儀之數禮樂無經學業不法凡是之屬太師之任也
逸禮曰太公為太師周公為太傅召公為太保

史記曰周文王得呂尚于磻溪以為師謂之太公武王
嗣位號曰師尚父成王即政尊為太師

漢書音義曰師訓也

應劭漢官儀曰孝平皇帝元始元年太后詔曰太師光
今年老有疾俊又大臣惟國之重書曰無遺老成國之
將興尊師重傳其令太師無朝十日一賜餐賜以靈壽

杖黃門令為太師于省中施坐置几太師入省用杖焉
續漢書曰趙典篤學博文宜佗國師即師也

獻帝春秋曰董卓自號太師御史中丞以下皆拜皇甫
嵩與卓爭權後嵩為中丞見卓拜卓曰可以服未嵩曰
安知明公乃至于是卓曰鴻鵠固有遠志但燕雀不知
耳嵩曰昔與明公俱為鴻鵠但公今日變為鳳凰卓笑
曰卿卑服何得不拜

晉書載記曰蜀李壽以安車束帛聘龔壯為太師壯固

辭特聽縞巾素帶居師友之位

宋書曰太師太傅太保為三公訓護人主導以德義天子加拜待以不臣之禮非人則闕矣漢室保傅在三公上號曰上公自後常然

隋書曰高祖受禪李穆乘朝高祖降坐禮之拜太師替拜不名實食成安縣三千戶于是穆子孫雖在襁褓拜儀同其一門執象笏者百餘人穆之貴盛當時無比

唐書曰太宗降手詔曰朕觀前代明王聖主曷常無師

傳哉况朕鍾百王之末智不周物其無師傅何以匡朕之不逮詩不云乎不愆不忘率由舊章宜依古道置三師位也

道典曰太師古官殷紂時箕子周武王時太公成王時周公並為太師周公薨畢公代之秦及漢初並無至平帝元始元年初置以孔光居焉金印紫綬位在太傅上

太傅

大戴禮曰傅傳之德義也天子無恩於父母不惠於庶

人無禮於臣不中於折獄不衰於喪不敬於祭不信於諸侯不議於戎事不厚於德不强於行不從太師之言凡是之屬太傅之任也

漢書曰王莽權日盛孔光憂懼不知所出上書乞骸骨莽白太后曰帝幼小宜師傅領宿衛明年徙為太師莽為太傅光嘗稱疾不敢與莽並

漢書音義曰傳覆也

東觀漢記曰詔云行太尉事趙喜三葉在位為國元老

其以喜為太傅

又曰胡廣為太傅掾錄尚書事時年八十而心力克壯
繼母在堂朝夕瞻省傍無几杖言不稱老練達事體明
解朝章雖無謬直之風屢有補闕之益

又曰鄧禹字仲華以元功拜太傅進見東向甚見尊寵
後漢書曰張禹遷為太傅鄧太后以殤帝初育_{育生也}欲

令重臣居禁內乃詔禹舍宮中給帷帳牀褥大官朝夕
進食五日一歸府每朝見特贊與三公絕席

續漢書曰太傅掌以善道無常職每帝即位輒置一人錄尚書事堯輒省之

華嶠後漢書曰鄧彪字智伯為太傅賜爵關內侯百官總已以聽於彪恩寵之異莫與為比焉

應劭漢官儀曰太傅古官也周成王時康叔為之

高后元年初用王陵金印紫綬

又曰和帝冊故太尉鄧彪曰元功之族三讓彌高今以彪為太傅

魏志曰鍾繇遷太傅繇有膝疾拜起不使時華歆亦以高年疾病朝見皆使載輿車虎賁舁上殿就坐是後三公有疾遂以為故事

晉書曰何曾為太傅乞遜位詔會朝劔履乘輿上殿如漢相國蕭何田千秋魏太傅鍾繇故事

宋書曰晉宣帝為魏太傅誅曹爽後置左右長史掾屬舍人各十人事既非常加又領兵非准例也

齊職儀曰太傅品秩冠服同太宰成王即位周公為太

傅遷太師秦無其職漢惠帝崩呂后以丞相王陵為少
帝太傅位在三公上

後魏書淮陽王欣大統中為太傅文帝謂欣曰王三為
太傅再為太師自古人臣不聞此例欣遜謝而已

北齊書曰高歸彥作亂冀州詔段韶與東安王婁叡率
衆討平之遷太傅賜女樂十人并歸彥果園一千畝

後周書曰王盟為太傅盟姿度弘雅仁而汎愛雖位居
師傅禮冠羣侯而謙恭自處未常以勢位驕人魏文帝

甚尊重之

賈誼新書曰昔周文王使太公望傅太子發嗜鮓

大河反

魚而公弗予文王曰發嗜鮓魚何為弗予太公曰禮鮓魚不登于俎豈有非禮而可以養太子哉

說林曰太傅府有三才裴邈清才潘陽中大才劉慶孫長才

曹植輔臣論曰蓋精微聽察理析毫分規矩可則阿保不傾羣言系于口而研覈是非典誥摠于心而唯所用

之者鍾太傅也

王廙之保傅箴曰保傅之賢明宗國寧輔弼之不忠禍
及于躬無曰父子無間昔有潘崇無曰至親無二容江
充

太保

周禮曰保氏掌諫王惡

諫者以禮
義正之也

大戴禮曰天子處位不端受業不敬言語不序聲音不
中律進退升降不以禮俯仰周旋不以節凡此之屬太

保之任也

尚書大傳曰成王在豐欲宅洛邑使召公來相宅六日

乙未王朝步自周則至于豐惟太保先周公相宅

太保
召公

先周公視
洛邑也

應邵漢官儀曰太保古官也保養也

晉書曰王祥字休徵泰始元年拜太保三年御史中丞
侯史光上言祥久以疾病闕廢朝會應免官詔曰太保
耆艾元老高行清粹朕所毗倚以隆道弘治者也前後

遜讓不從所執此非百司所得議也其寢光奏

晉起居注曰太保衛瓘明允篤誠有匪躬之志其給千
兵騎百人

齊職儀殷太甲時伊尹為太保周成王時召公為太保
崔鴻十六國春秋蜀李雄錄曰雄異母兄始字伯敬為
太保善撫士衆衆多歸之時人為之語曰欲養老屬太
保

呂氏春秋曰荆文王得如黃之狗宛路之矰以田於雲

夢三月不反得丹陽之姬暮年不聽朝保申曰先王卜以臣為保吉今王暮年不聽朝王之罪當咎王大臣將咎王王曰不穀免於襁褓而齒於諸侯願請變更而無咎保申曰臣承先王之令不敢廢也王不受咎是廢先王之令也臣寧抵罪於先王王曰敬諾引席王伏保申束細箭五十跪而加之于背如此者再謂曰王起王乃變更召保申殺如黃之狗折宛路之矰放丹陽之姬兼國三十九保申之力也

太宰

周禮天官上曰太宰之職掌建邦之六典佐王治邦國

又曰太宰以九兩繫邦國之民

兩竊合之言繫者以維持其性情使不離散也

尚書伊訓曰百官總己以聽冢宰伊尹乃明言烈祖之

成德以訓于王

湯有功烈之祖故稱言功訓太甲也

又曰冢宰統百官均四海

家語曰官屬不治分職不明法政不一百事不記曰亂

亂則飭冢宰

飭謂整攝

晉書曰武帝時何曾屢上書遜位詔以司徒所掌煩務不可以久勞者艾其進位太宰朝會乘輿劍履上殿如漢蕭何魏鍾繇故事

又曰何曾為太宰年老禮優每召見勅以常所飲食服物自隨令二子侍

又曰太宰萊與王導同受顧命輔成帝時帝幼冲詔萊依安平獻王孚故事設牀帳於殿上帝親迎拜

又曰安帝以太宰瑯琊王德文不宜嬰拂事務以紆論

道之重可袞冕紱服綠盪

音庚

綬羽葆鼓吹

盪綠也以綠為質又曰盪

草名也出瑯琊平昌縣似艾可染綬因以為綬名也

晉公卿禮秩曰安平王孚朗陵公何曾汝南王亮皆為太宰

齊職儀曰太宰品第一金章紫綬佩山玄玉堯命羲和使主陰陽之職羲和司天即天官也后稷伏事虞夏敬授民時尊稷為天官夏稷後不窋失官由是廢稷殷以其官為冢宰周公在鄴為太宰召公又居之秦漢魏

無其職晉武以從祖安平王孚為太宰安平薨省咸寧
四年又置或謂本太師之職避景皇諱改為太宰周之
卿位晉武依周置職以尊安平非避諱也元興中恭帝
為太宰桓元都督中外博士徐豁議太宰非武官不應
都督遂從豁議

後周書曰文帝依周禮建六官遂置天官大冢宰卿一
人掌邦理以建六典佐皇帝理邦國

通典曰太宰於殷為六太於周為六卿亦曰冢宰周武

王時周公始居之掌建邦之治秦漢魏並不置晉初依周禮備三公三公之職居太師首景帝名師故置太宰以代之而以安平獻王字居焉

仲長統昌言曰冢宰堯官也尚書曰冢宰一曰治典以治官府以紀萬民二曰教典以安邦國以教官府以擾萬民三曰禮典以統百官以和邦國以諧萬民四曰政典以平邦國以正百官以均萬民五曰刑典以詰邦國以任百官以生萬民魏溫子昇為上黨王穆讓太宰表

曰臣聞策蹇長途終慙一日之致懸縷層臺難任千鈞
之重固知才弱不可自強力微難以企及智小謀大恐
貽折足之憂才輕任重懼有絕臙之悔既慮鑠金固陳
匪石

總敘三公

六典曰三公論道之官也蓋以佐天子理陰陽平邦國
所統不一職故以名其官

尚書曰惟茲三公論道經邦變理陰陽

周禮曰三槐三公位焉

公羊曰三公者何天子之相

春秋漢含孳曰三公在天為三台九卿為北斗三公象
五嶽九卿法河海二十七大夫法山陵八十一元士法
谷阜合為帝佐以匡綱紀

史記曰公孫弘以春秋白衣為天子三公漢初因秦置
丞相而弘為之則丞相為三公矣

漢書曰六符

孟康曰秦階三台也凡六
星也六符星之符驗也

晉書曰文帝為晉王何曾與高柔鄭沖俱為三公將入見曾獨致拜盡敬二人猶揖而已

晉官品令曰三公綠綬綬也

宋志曰三公黃閣前史無其義按禮記曰士鞞與天子同公侯大夫則異鄭元注云士賤與君同不嫌也夫朱門洞啓當陽之正色也三公之與天子禮秩相亞故黃其閣以示謙不敢斥天子宜是漢來制也

通典曰隋置太尉司徒司空以為三公參議國之大事

依北齊置府僚無其人則闕祭祀則太尉亞獻司徒奉
俎司空行掃除其位多曠行事則攝

天文錄曰三台星一名三能一名天柱三公之位也在
人曰三公天曰三台

陶氏職官要錄曰三台擬三公黃帝以風后配上台天
老配中台五聖配下台

韓子曰背私曰公三象鼎足數三法三光


傅子曰三公者佐天子理陰陽

環濟要畧曰三公者象鼎三足共承其上也

說苑曰三公正天下調陰陽節風雨

古今通語曰異官同爵共位別職興仁隆化幽贊神明者謂之太尉和五教理人倫使風行俗平萬國咸寧者謂之司徒使國家化理法錯刑清事均民聚者謂之司空若仁義之路開和平之氣通則五星順行庶績咸熙李固奏記曰湯問伊尹公卿大夫其相何如伊尹對曰三公智通大道應變不窮者也其言足以調陰陽正四

時節風雨非大罪不遜位



太平御覽卷二百六

欽定四庫全書

子部
太平御覽卷二百七十二

詳校官侍讀學士臣沈威照

員外郎臣牛稔文覆勘

總校官降調編修臣倉聖脈

校對官助教臣胡子襄

謄錄監生臣張士琛

欽定四庫全書

太平御覽卷二百七

宋 李昉等 撰

職官部五

太尉

司徒上

太尉

禮記月令曰孟夏之月命太尉贊傑俊

蔡邕章句曰太尉卿官

春秋運斗樞曰赤龍負圖以出河見堯與太尉舜等百

二十臣集發藏大麓

春秋合誠圖曰堯坐中舟與太尉舜臨觀鳳凰授圖

史記曰孝惠帝六年置太尉官

漢書曰太尉秦官也掌武事

又曰高祖言周勃重厚而少文然安劉氏者必勃也可
為太尉

東觀漢記曰劉彪字智伯為太尉在位清白廉讓以率

下

又曰張輔字孟侯為太尉父尚在輔每遷轉乃一到雒父來適會正臘公卿罷朝俱賀歲奉酒上輔父壽極欣慊莫不嘉其榮也

後漢書曰楊震字伯起嘗客於湖水外不荅州郡禮命數十年衆人謂之晚暮而震勵志愈篤後有鸛雀啣三鱸魚飛集講堂前都講取魚進曰凡鱸者卿大夫之服象也數三者法三台也先生自此升矣後果位至太尉又曰劉寬為太尉靈帝頗好學藝每引見寬令講經寬

嘗於坐被酒睡伏

被加也為酒所加也

帝問太尉醉耶寬仰對曰

臣不敢醉但任重責大憂心如醉爾

又曰張禹為太尉時連歲災荒府藏空虛禹上疏求入

三歲租稅以助郡國廩假

廩給也假借也

許之

又曰楊震代劉愷為太尉帝舅大鴻臚耿寶薦中常侍

李閔兄於震震不從寶乃自往候震曰李常侍國家所

重欲令公辟其兄寶惟傳上意耳

言非已本心傳在上之意

震曰如

朝廷欲令三府辟召固宜有尚書勅遂拒不許寶大恨

而去

又宦者傳曰曹嵩靈帝時貸賂中官及輸西園錢一億萬故位至太尉

續漢書百官志曰太尉一人掌方岳事物功課歲盡則奏其殿最而行賞罰世祖即位為大司馬

又曰太尉郊廟掌亞獻大喪告謚南郊

又曰王龔為太尉在位恭慎自非公事不通州郡書記其所辟命皆海內長者

謝承後漢書曰鄭宏為臨淮太守行春有二白鹿隨車夾轂而行宏怪問主簿黃國鹿為吉凶賀曰聞三公車輻畫作鹿明府當為宰相宏後果為太尉

又曰陳蕃拜太尉臨朝嘆曰黃憲若在不先佩印綬又曰鄭宏字巨君為太尉舉將第五倫為司空班位在下每正朝見宏曲躬自卑帝知遂置雲母屏風分隔之由此以為故事

又曰京兆朱寵字仲威為太尉家貧食脫粟飯卧布被

朝廷賜錦被梁肉皆不敢當

華嶠後漢書曰安帝即位太尉徐防以災異寇賊策免就國凡三公以災免自防始也

袁山松後漢書曰太尉劉虞讓位於羊續靈帝時為三公者皆輸禮錢千萬續舉襁袍以示之曰臣之所有唯此而已遂不代虞

張璠漢記曰楊秉字叔卿為太尉嘗曰我有三不惑酒色財也天下稱為名公

漢書百官表曰太尉秦官金印紫綬掌武事周勃灌嬰周亞夫等為之

又百官表注曰太尉古官也自上安下曰尉故以為號又應劭漢官儀曰章帝詔曰司空牟融典職六年勤勞不怠其以融為太尉錄尚書事

又曰冲帝冊書曰太尉趙峻貳掌樞衡有匪石不貳之心

又曰三公國之楨幹朝廷取正以成斷金大司農李固

公侯之苗忠正不撓有吏魚之風其以固為太尉

又曰河間相張衡說明帝以為司徒治府以榮之欲更
治太尉府府公南陽趙憙也西曹掾安眾鄭均素好名
節以為朝廷新造北宮整飭宮寺今府本館陶公主第
舍員職鮮少自足相授憙表陳之即見聽許其冬帝幸
辟雍歷二府光鮮壯麗而太尉府獨卑陋顯宗東顧嘆
息曰屠牛縱酒勿令乞兒為宰

漢官典職曰太尉孝文三年置七年省武帝建元二年

置五年復省更名大司馬建武二十七年復置太尉

魏志曰文帝踐祚鍾繇遷太尉時華歆王朗並先世名臣帝罷朝謂左右曰此三公者乃一代之偉人也後日殆難繼矣

又曰華歆拜太尉歆疾乞退讓位於管寧文帝不許臨當大會乃遣散騎常侍繆錫奉詔諭旨曰朕新蒞庶事一日萬機懼聽斷之不明賴有德之臣左右朕躬君其力疾就會以惠予一人將立几筵命百官總己以須君

到然後御坐

又曰鄧艾字士載既平劉禪詔曰艾曜威奮武深入虜
庭斬將搴旗梟斬鯨鯢使僭號之主稽首係頸歷世誅
誅一朝而平兵不踰時戰不終日震徹席卷蕩定巴蜀
雖白起破強楚韓信克勁趙吳漢擒子陽亞夫滅七國
計功論美不足比勲其以艾為太尉增邑二萬戶

又曰王祥字休徵為太尉司馬文王進爵為王祥與司
徒何曾司空荀顛並詣王顛曰相王尊重今可相率而

拜祥曰相國勢位誠為尊貴然乃是魏之宰相吾等魏之三公公王相去一階而已班列大同安有天子三公可輒拜人者耶損魏朝之美虧晉王之德君子愛人以禮吾不為也及入荀顛遂拜祥獨長揖文王謂祥曰然後知君子見顧之重

吳志曰孫皓詔曰范慎勲德俱茂朕所敬馮宜登上公以副衆望可為太尉

晉中興書曰郗鑒為太尉雖在公位冲心愈約勞謙日

集誦翫墳索自少及長身無擇行家本書生後因喪亂
解巾從戎非其本願常慷慨然咸康五年秋寢疾上䟽
遜位優詔不許

又曰桓溫授侍中太尉固讓不受旬月之中使者八至
輶軒相望於道溫遂親職

謝靈運晉書曰秦有太尉掌兵漢仍修之或置或省且
故司馬之官主九伐之職

齊職儀曰魏文黃初二年日蝕奏免太尉賈詡詔天地

災害責在朕躬勿與三公遂為求制

五代史後唐書莊宗御文明殿冊齊王張全義為守太尉如常儀禮畢全義於尚書都省領事宰臣群官在列左諫議竇專不降階為御史所劾專援引舊典以對時宰臣不記故事無能詰責寢而不行

汝南先賢傳曰陳蕃拜太尉讓曰齊七政訓五兵臣不如議郎王暢

天文錄曰三公星在北斗杓南主宣德化和陰陽若今

太尉司空之象也

摯虞冊隴王太尉文曰朕惟君行為時表親則宗臣論道經邦保乂皇家是用進登上台

司徒上

尚書舜典帝曰契百姓不親五品不遜五品五常遜順也汝作

司徒敬敷五教在寬五常之教務在寬也

禮記玉制曰司徒脩六禮以節民性明七教以興民德齊八政以防淫一道德以同俗養耆老以致孝恤孤獨

以逮不足上賢以崇德簡不肖以黜惡

司徒地官卿掌邦教也

又月令曰孟夏之月司徒行縣鄙

蔡邕月令章句曰司徒教官也

又曰契為司徒而民成謂知五教之禮也

毛詩緇衣曰緇衣美武公也父子並為周司徒善子其職周人宜之故美其德以明有善勸有功焉

周禮曰乃立地官司徒帥其屬而掌邦教以佐王安擾

邦國

擾亦安也

又曰大司徒之職掌建邦之土地之圖與其

人民之數以佐王安擾邦國以天下土地之圖周知九

州之域廣輪之數辨其山林川澤丘陵墳衍原隰之名物

又曰地官曰大司徒之職凡建邦國以土圭土其地而

制其域

土其地猶言度其地也

又曰大司徒之職以五禮防萬民之偽而教之中

禮所以節

止民之侈偽使其行得中

以六樂防萬民之情而教之和

樂所以蕩正民之情

思使其心應和也

又地官曰大司徒之職以保息六養萬民一曰慈幼

保息

謂安之也慈幼
謂愛幼少也

二曰養老三曰振窮四曰恤貧五曰寬

疾六曰安富

安富為平其
徭役不專取

春秋傳曰祝鳩氏司徒也

尚書大傳曰百姓不親五品不遜則責司徒

韓詩外傳曰君臣不正人道不和國多盜賊人怨其上
則責之司徒

論語摘輔像曰仲尼為素王顏淵為司徒

家語曰地宜不殖財物不畜萬民飢寒教訓不行風俗

淫僻人民流散曰危危則飭司徒

飭謂整攝

漢書曰祝良字仲子東海人為大司徒鮑恢為長史以事至東海過其家見良妻布衣徒跣曳柴從田中歸恢告曰我司徒史也故來授書欲見夫人妻曰妾是也若掾耶恢下拜之歎息而歸

東觀漢記曰鄧禹為司徒討赤眉不以時進光武貽書曰司徒堯也赤眉桀也今長安飢民孰不延望耶又曰袁安為司徒每朝會憂念王室未嘗不流涕

又曰郭丹為司徒在朝名清廉公正

後漢書曰蔡茂字子禮代戴涉為司徒在職清儉匪懈
茂初在廣漢夢在大殿之極上有三穗禾茂跳取之得
其中穗輒復失之主簿郭賀離席慶曰大殿者官府之
形象也極而有禾人臣之上祿也取其中穗中台之位
也於字禾失為秩雖曰失之乃以得祿秩也衮職有闕
君其補之旬月而茂徵焉辟賀為掾

又曰光武即位高邑使使者持節拜鄧禹為大司徒策

曰前將軍禹深執忠孝與朕謀謨帷幄決勝千里孔子
曰自吾有回門人日親斬將破軍平定山西功效尤著
百姓不親五品不遜汝作司徒敬敷五教在寬今遣奉
車都尉往授印綬封為鄼侯邑萬戶其敬之哉禹時年
二十四矣

又曰范遷為司徒有宅數畝田不過一頃復推與兄子
其妻常謂曰君有四子而無立錐之地

又曰張湛稱疾不朝後大司徒戴涉被誅

涉字叔平冀州清河人也

坐所屬人盜金下獄帝強起湛以代之湛至朝堂遺失漉便漉小便也

音所流反因自陳疾篤不能復任朝事遂罷之

又曰馮勤遷司徒先是三公多見罪退帝賢勤欲令以

善自終因讌見從容戒之曰朱浮上不忠於君下陵轢

同列竟以中傷朱浮為大司空坐賣美國思免又為陵轢同列帝銜之惜其功不忍加罪至

今死生吉凶未可知豈不惜哉人臣放逐受誅雖復追

嘉賞賜賻祭不足以償不訾之身訾量也言無量可比之價重之極也訾與

賈同忠臣孝子覽照前代以為鑑誠能盡忠於國事君

無二則爵賞光乎當代功名列於不朽可不勉哉勤愈
恭約盡忠號為任職

又曰宣秉字巨公拜大司徒所得俸祿以收養親族自
無儋石之儲

又曰鮑昱代王敏為司徒賜錢帛什器帷帳

又曰司徒一人掌養民事凡教民孝悌遜順謙儉養生
送死事則議其制建其度凡四方民事功課歲盡則奏
其殿最行賞罰

謝承後漢書曰劉寵為司徒卧粗布被

漢官典職曰司徒本丞相官哀帝改為大司徒主司徒
衆遜五品府與蒼龍闕對厭於尊者不敢稱府也

魏志曰華歆字子魚拜司徒歆素貧祿賜以賑施親戚
故人家無儋石之儲公卿嘗並賜沒入生口唯歆出而
嫁之帝嘆息下詔曰司徒國之雋老所與和陰陽理庶
事也今太官重膳而司徒蔬食甚無謂也特賜御衣及
其妻子男女皆作衣服

又曰黃初元年改相國為司徒御史大夫為司空奉掌
郎中令為大司農

魏名臣奏曰黃門杜恕奏曰漢故事人民病疾責之司
徒

蜀志曰許靖字文休及先主即尊號策靖曰朕獲奉洪
業君臨萬國夙宵徨徨不能撫綏百姓不親五品不遜
汝作司徒其敬敷五教在寬君其勗哉秉哉無怠稱朕
意馬靖雖年踰七十愛樂人物納誘後進清談不倦丞

相諸葛亮皆為之拜

吳錄曰丁固為司徒初為尚書夢松樹生其腹上謂人曰松字十八公也後十年吾當為公乎遂如夢焉

太平御覽卷二百七

欽定四庫全書

太平御覽卷二百八

宋 李昉等 撰

職官部六

司徒下

司空

司徒下

晉書曰王渾遷司徒渾以司徒文官吏不持兵令皆皂服
又曰石苞為司徒奏州郡農桑未有賞罰之制宜遣掾

屬循行皆當均其土宜舉其殿最然後黜陟焉詔曰農
殖者為政之本有國之大務也雖欲安民興化不先富
而教之其道無由而至今四海多事軍國用廣加乘征
役之後屬有水旱之患倉庫不充百姓無積稼穡樹藝
司徒掌之今雖登論道經國然立政唯時所急故陶唐
之世稷官為重今司徒位當其任有毀家紓國蹇蹇匪
躬之志其使司徒督察州郡播殖其增置掾屬十人聽
取王官練事業者苞在位稱為忠勤帝每委任焉

又曰何邵曾之子也永康初遷司徒趙王倫篡位及三王交爭邵以軒冕而遊其間無怨之者

又曰何曾字穎考以太保侍中領司徒何曾固讓詔曰司徒舊丞相之職自古及今揔論人物化治之本以君宏道故選於衆而復盤桓非所聞也

又曰魏舒為司徒不持激厲不課人短陳留周震為諸府所辟書既下公輒亡僉號震曰殺公掾舒辟之果無患又曰王戎代王渾為司徒高選長史西曹掾委任責成

戎形狀短陋而目明徹威儀不足常畜馬輦無日不出親類之亡無不吊也常以象牙竿晝夜竿計家財遠及田牧性又至儉不能善自奉養財不出外天下之人謂之膏肓之病

又曰魏舒字陽元為司徒年過致仕有遜讓意而無居宅乃漸以奉秩之餘為第一所舒素為人先行而後言故未曾語親踈言當遜位九年正月整法服入殿朝會罷還奉送章綬內外莫有知舒此情者

曹家之晉記曰王戎再至司徒委事掾屬乘小馬從便門出見者不知是台司也

晉諸公讚曰司徒博祗疾遜位不許板輦上殿

晉中興書曰劉隗從兄疇字王喬有重名司徒蔡謨每歎曰若使劉王喬得南渡司徒之美選也

又曰蔡謨字道明遷司徒謨固讓曰若我作司徒將為後代唾義不敢拜詔數十下謨章表十餘上陳以疾篤帝臨軒自朝至申而徵不至公卿以蔡公傲無人臣之

禮奏送謨廷尉謨率子弟詣闕稽顙詔免為庶人

齊職儀曰司徒品秩冠服同丞相郊廟服冕同太尉漢哀帝從朱博議始置三司改丞相為大司徒以孔光為之魏以華歆為之

北齊書曰孔騰初北境亂騰亡一女及貴推訪不得疑其為人婢及為司徒婢訴良者皆免之願免千人異得其女神武知之大怒遂解司徒

隋書王誼為大司徒蘇威立議以為戶口茲多民田不

瞻欲減功臣之地以給民誼奏曰百官者歷世勲賢方蒙爵土一旦削之未見其可如臣所慮正恐朝臣功德不進何患民田有不足上然之竟寢威議

唐書曰太和四年守司徒裴度上表辭冊命言臣此官已三度受冊有覲顏目從之

九州春秋曰靈帝賣官廷尉崔烈入錢五百萬以買司徒烈子均亦有時名烈問曰吾作公天下人謂何如對曰大人少有高名不謂不當為公今登其位海內嫌其

銅臭烈舉杖擊之均走烈曰子受父搥而走可謂孝乎
均曰舜之事父少杖則受大杖而走不陷父於不義烈
曰爾以吾為瞽聵耶

華陽國志曰自建武之後羣儒修業開案圖緯漢之宰
相當出坤鄉於是司徒李公屢登七政太傅于堅弈代
論道矣

荀氏家傳曰組字大章中宗為晉王時將徵為司徒階
太常賀循循曰組舊望清重勤勞顯著遷順五品以統

人倫實充人望詔以組為司徒

江氏家傳曰江統字應元時太傅從事中郎庾子高以風韻見重亦雅敬君德每云當今可以居司徒充民望者江生其人也

管子曰昔者黃帝得祝融辨南方故使為司徒

符子曰魯侯欲以孔子為司徒將召三桓而議之乃謂左丘明曰寡人欲以孔子為司徒而授以魯政焉寡人將欲詢諸三子左丘明曰孔子聖人與夫聖人任政過

在離位焉君雖欲謀其選弗合乎魯侯曰吾子奚以知之丘明曰周人有愛裘而好玃羞欲為千金之裘而與狐謀其皮欲具少牢之玃而與羊謀其羞言未卒狐相率逃於重丘之下羊相呼藏於深林之中故周人十年不制一裘五年不具一牢何者周人之謀失之矣今君欲以孔丘為司徒召三桓而議之亦與狐謀裘與羊謀羞哉於是魯侯遂不共三桓謀而召孔丘為司徒典畧曰契為司徒百姓和親夔主賓客遠人畢至

蔡邕申鼎銘序曰惟建寧四年春三月進公登士王前
廷乃制詔曰其以司空橋玄為司徒公拜稽首三讓然
後受命

曹植輔臣論曰辯博通幽見傳異度德實充塞于內知
謀縱橫於外解疑釋滯剖散盤結者主司徒

荀勗答詔曰咸寧四年司徒何曾遷太宰詔問勗司徒
處當得人副遠近之望并治事見才誰可也勗表三公
具瞻之望誠不可用非其人昔魏文帝用賈詡為公孫

權笑之尚書令李允忠亮高潔應處台輔

宋謝莊為北中郎謝兼司徒章曰臣聞變理陰陽寅亮
天地弗惟其官無人則闕司徒掌敷五典職擾兆民豈
悟乾靈罔遺光渥方闡不次之任殊絕蕃岳豈可權師
三事假備六符慙震周迴顧步交悖

司空

尚書曰舜曰咨四岳有能奮庸熙帝之載奮起也釁曰

伯禹作司空帝曰俞咨禹女平水土惟時懋哉帝曰然

嗟禹女

有平水災之功惟是
勉之遂委以政也

又曰司空掌邦土居四民時地利
冬官卿主國土地以居士農工商四民使

順天時分地利也

禮記王制曰司空執度地
司空冬官卿掌邦事者也度丈畫也量地遠

近制邑井之處也興事任力
事謂築邑宿市

春秋昭四年奭鳩氏司空也

續漢志曰司空為冬官掌邦事凡營城邑復溝洫修墳防之事則議其利建其功四方水土功課歲盡則奏殿

最而行賞罰凡國有大造大疑謀畫與大尉皆同

春秋元命苞曰危東六星兩兩而北曰司空主水金木
守之天下憂水

韓詩外傳曰山陵崩陁川谷不通五穀不殖草木不茂
則責之司空

尚書大傳曰溝瀆擁過水為民害田廣不墾則責司空
尚書刑德收曰神禹長于地里水泉九州得括象圖故
堯以為司空

家語曰度量不審舉事失理都鄙不修財物失所曰貧

貧則飭司空

飭謂整攝

又曰魯定公以孔子為司空乃別五土之性

五土山林川澤丘陵

墳衍原隰也而物其所生之宜咸得厥所

漢書曰成帝綏和元年始更名御史大夫曰大司空

初改

為司空議者又以縣道官有獄司空故復加為大司空亦所以別大小之文

又曰彭宣字子佩為大司空而王莽為大司馬宣上書

曰三公鼎足承君一足不任則覆亂美質臣老病願上

印綬

又曰何武字君卿為司空事後母不篤詔以其舉措煩碎不合衆心孝聲不聞惡名流行其上大司空印綬遂冊免之

東觀漢記曰杜林代張純為大司空務于無為第五倫為司空奉公不撓言事無所依違

後漢書曰王梁初為野王令世祖議選大司空而亦伏符曰王梁主衛作玄武帝以野王衛之所徙

史記曰衛文君自漢

陽徙於野王

玄武水神之名司空水土之官也于是擢拜梁

為大司空

又曰竇融拜冀州牧十餘日又遷大司空融自以非舊臣一旦入朝在功臣之右召會進見容貌辭氣卑恭已甚帝以此愈親厚之

又曰陳寵為司空府故事以計吏至時自以下皆屬籍不通賓客以防交關寵去籍通客以明無所不受論者大之

又曰張奮字穉通父純臨終勅家丞曰司空無功於時
猥蒙爵土身死之後勿議傳國奮兄根少被病光武詔
奮嗣爵奮稱純遺勅固不肯受帝以奮違詔勅取下獄
奮惶怖乃襲

又曰第五倫章帝立徵拜司空奉公不撓言議果決後
自陳老病以二千石祿俸終身

續漢書曰張奮為司空時歲災旱祈雨不應上表即時
引見復口陳時政之宜帝詔太尉司徒幸洛陽獄錄囚

徒大雨三日

華嶠後漢書曰第五倫雖峭直然常以中興以來二主好吏化俗尚苛刻政化之本宜先以寬和及為三公值章帝長者多恕屢有善政上䟽褒稱盛美因以勸成德風也

又曰伏恭為太僕帝臨辟雍於行禮中拜恭為司空儒者以為榮

袁宏後漢記曰第五倫為司空有人與倫千里馬者倫

雖不取每三公有所選舉倫心不忘也然亦終不用

漢官解詁曰下理坤道上和乾光謂之司空

魏志景初元年司徒司空並缺散騎侍郎孟康曰夫宰相者天下之所瞻效誠宜得兼忠履正本德服義之士足為海內所師表者竊見司隸校尉崔林稟自然之正性體高雅之宏量論其所長以比古之人忠直不偽則史魚之儔也清儉守約則季文之匹也遂為司空封安陽亭侯三公封列侯自林始也

又曰徐邈拜司空歎曰三公論道之官無其人則缺豈可以老疾忝之哉固辭不受

晉書曰裴秀為司空刪定國制損益多善當禪代之際總納言之要其所裁當禮無違者又案禹貢山川地名古有今無者皆隨事注列作禹貢地域圖十八篇事成奏上藏於秘府秀在位四年為當世名公

又曰鄭袤字林叔為司空天子臨軒遣就第拜受袤謂使曰宜以徐景山為司空徐公曰三公上應天心苟非

其人實傷和氣固辭見許

晉起居注曰武帝太始七年詔光祿大夫鄭袤體行純
正履道冲粹退有清和之風進有素絲之節宜齊三階
之曜補袞職之闕明弼朕躬以匡不逮其以袤為司空
晉中興書曰虞玩字士瑤王導郗鑒庾亮相繼薨遷玩
為司空給羽林四十人玩比陳讓不聽既拜歎息謂賓
客曰以我為三公是天下無人矣談者以玩為知言
齊職儀曰司空品秩官服同太宰舜以禹為司空成王

以毛公為司空以宋武公之諱改司空為莫敖秦置御史大夫省司空

後魏書曰伊馥拜司空及為三公清約自守為政舉大綱而已不為苛碎

後周書曰冬官謂之大司空卿掌邦事以五材九範之徒佐皇帝富邦國大祭祀行灑掃廟社四望則奉豕牲唐書曰天寶十三載冊楊國忠為司空其日雨土

五代史唐書曰清泰二年制以前同州節度使馮道為

守司空時議以自隋唐已來三公無職事自非親王不
恒置於宰臣為加官無單置者道在相位時帶司空及
罷鎮未命官議者不練故事率意行之及制出言議紛
然或云便可綜中書門下事或云須冊開府及就列無
故事乃不就朝堂序班臺官兩省官人就列方入宰臣
退踵後先退及晉天福中以李鑄為司空周廣順初以
竇貞固為司徒蘇禹珪為司空遂以為例議者不復有
云

華陽國志曰趙瑤字元珪拜扶風太守未之郡司空張
溫謂第五伯魚從蜀郡為司空今掃吾第以待足下

荀氏家傳曰荀爽字慈明董卓徵公到府三日策拜司
空爽起巖穴九十九日而為台司世號為白衣登三公
又曰晉袁愷為司空文帝平蜀議復五等表魏朝使公
定禮儀中護軍賈充正法律尚書僕射裴秀議官制公
遂刪定舊文行正式為一代之典書成入藏於秘府其
服色旗幟法駕之式禮樂犧牲柴燎之典袷禘遷毀配

食之制及於明堂辟雍之儀皆所議定朝廷歸其美公
既為台輔德望清重加以留心禮教以年耆多疾不便
朝見詔使侍中任愷諮問政化所宜行否

又曰荀蕃字大堅為司空劉崑表於太子曰司空荀蕃
朝廷之舊臣奕世忠勤乃心皇家具瞻之望唯蕃而已
宜增位號授分陝之重永令臣等有所憑準

白虎通曰司空主土不言土而言空空尚主之况於實
乎

環濟要畧曰冬官司空掌邦事營城郭都邑立社稷宗廟造宮宅器械監百工

典畧曰禹為司空陂九山通九澤決九川定九州使各以其職來貢

傅子曰荀仲預稱禹十二為司空

世論曰諸葛誕為鎮東將軍都督揚州司馬文王秉政徵誕為司空書至誕曰我當在文王書後今便為司空不貴使者出齋書使以兵付樂綝此必綝所為乃將左

右數百人至揚州人欲閉門誕叱之曰卿非我故吏耶
逕入綈逃上樓就斬之

齊孔稚珪為王敬則讓司空表曰故李通豪膽以親寵
登用王基才勇以聲華入選先帝擢臣以榮華陛下申
臣以富貴得北帶五州東跨六郡內亞三島外齊四岳
蟬佩之映則左右交暉龜組之華則縱橫吐曜輕輪徐
動則劔騎如雲飛蓋暫停則歌鍾成列擬金龍吹鬱其
前鳴笳鳳管疊其後鄧禹若不遭漢光則南陽之掾吏

微臣若不逢明聖則孤城之戍客豈可加以正台之席
登以論道之寄啓黃扉而變五緯躡青帷而調四序

梁劉孝儀為臨州王解司空表曰臣以庸薄謬竊隆重
職班三事任總六條衣衮坐槐既闕論道駝傳憇棠尤
慙為政而俯司土地仰變陰陽折撓之機已彰愆伏之
咎爰著今水蛟不擢旱魃為災山無蒼蔚雲成煙火陛
下曲私未垂策免臣職是當於何遜責降茲台步協此

天人

太平御覽卷二百八

欽定四庫全書

太平御覽卷二百九

宋 李昉等 撰

職官部七

大司馬

三公府掾屬

大司馬

韋昭辯釋名曰大司馬馬武也大總武事也大司馬掌
軍古者兵車一車四馬故以馬名官

周禮夏官曰大司馬之職掌建邦國之九法以佐王平

邦國也平成制畿封國以正邦國封為立封設儀辨位以等

邦國儀謂諸侯之儀進賢興功以作邦國作起也起其

心使建牧立監以維邦國牧州牧也監監一國制軍詰

禁以均邦國詰猶窮治也施貢分職以任邦國職謂賦稅也

力之所簡稽鄉民以同邦國簡謂比數之均守平則以

安邦國均之者尊守大卑比小事大以和邦國比猶親也

小國小國事大以九伐之法平邦國諸侯有違王命則出

國相和合也

尚書曰司馬掌邦政統六師平邦國

毛詩曰祈父

祈父司馬也

予王之爪牙

春秋運斗樞曰黃帝與大司馬容光觀鳳凰銜圖置黃
帝前

尚書中候曰稷為大司馬舜為太尉

尚書大傳曰蠻夷滑夏寇賊奸宄則責之司馬

韓詩外傳曰故陰陽不和四時不節星辰失度災變非
常則責司馬

河圖錄運法曰黃帝坐立扈閣上與大司馬容光左右
輔將周昌等百二十人觀鳳凰銜書

家語曰賢能而失官爵功勞而失賞祿士卒疾怨兵弱
不用曰不平不平則飭司馬

史記曰楚大司馬景舍帥軍滅蔡蔡侯奉社稷而歸之
楚發其賞舍辭曰發誠布令而敵退是王威也相攻而
敵退是將威也戰而敵退是衆威也臣不宜以衆威受
賞

漢書曰元狩四年上命大將軍衛青驃騎將軍霍去病各將兵五萬騎數十萬出塞斬首捕虜有功廼置大司馬

又曰董賢為大司馬時年二十二雖為三公常給事中領尚書百官因賢奏事單于來朝宴見羣臣上前單于怪賢年少以問上令報曰大司馬年少以大賢居位單于乃起拜賀漢得賢臣

又曰孝元王皇后成帝母也家凡十侯五大司馬外戚

莫盛馬

又曰成帝綏和元年賜大司馬金印紫綬置官屬祿比丞相

東觀漢記曰更始欲以近親巡行河北大司徒賜言上弟秀可用更始以上為大司馬遣之河北

又曰讖云孫咸征狄命以平狄將軍孫咸行大司馬事後漢書曰世祖北擊羣賊吳漢將突騎五千為軍前鋒數先登陷陣及河北平漢與諸將奉圖書上尊號世祖

即位拜漢為大司馬

又曰帝疾瘳召見陰興欲以代吳漢為大司馬興叩頭流涕固讓曰臣不敢惜身誠恐虧損聖德不可苟冒至誠發中感動左右帝遂聽之

漢官序曰三司之職司馬主兵漢承秦曰太尉武帝改曰大司馬無印綬官無加而已世祖改曰太尉

吳志曰赤烏九年秋七月以車騎朱然為左大司馬衛將軍全琮為右大司馬

晉書石苞太始之初為大司馬舊參軍於都督無敬故
孫楚抗衡於苞苞以楚傲更相表禮故參軍有敬自楚
始也

又曰齊王冏之盛也有一婦人詣大司馬府求寄產吏
詰之婦人曰我截臍便去耳識者聞而惡之

又曰陳騫咸寧初轉大司馬騫因入朝言於帝曰胡列
臺宏皆勇而無謀強於自用非綏邊之材將為國耻願
陛下詳之時宏為揚州刺史不承順騫命帝以為不協

相構乃徵宏既至復以為涼州刺史竊嘆曰以為必
敗二人後果失羌戎之和皆被寇喪役征討連歲僅能
得定帝乃悔之

晉武帝太始官名曰大司馬石苞開通爽悟秉意不辟
晉公卿禮秩曰司馬兵官也魏氏大司馬大將軍各自
為官在三司上晉以石苞為大司馬次三司下

晉諸公贊曰義陽王為大司馬時父孚為太宰父子居
上公中代以來未之有也

晉中興書曰王猛少貧賤常至洛陽貨畚有人於市買其畚云家近在此可隨我取直猛隨去忽至深山此人曰且住當先啟道君須臾猛進見一公踞胡床頭白侍從十許人有一人引猛云大司馬公可進猛因拜老公曰王公何緣拜即十倍售畚直遣人送猛出回視乃嵩高山也

齊職儀曰大司馬品第一秩中二千石金章紫綬武冠絳服朝佩山玄玉其在少昊則雕鳩氏之任顓頊以司

馬主火堯命羲叔為司馬夏官也唐虞二代以司夏官
棄居其職周成王以畢公高為司馬楚漢之際曹參周
勃始居其職

又曰大司馬府舊為闕王莽篡位故貶去馬

後魏書曰安定王休領大司馬高祖親行諸軍遇休以
三盜人狗於六軍斬之有詔赦之休執曰陛下將遠親
衝盧故親御六師跋踣野次軍行始爾已有奸竊如其
不斬何以息盜詔曰大司馬執憲誠如是但因緣會朕

王者之體亦時有非常之澤雖為軍法可特原之休乃
奉詔高祖謂司徒誕曰大司馬嚴而秉法君不可不慎
於是六軍肅然

後周書曰夏官謂之大司馬

管子曰昔黃帝得風后辨乎四方故使為司馬

又曰涼風至白露下天子命左右司馬全組甲勵士衆
傅子曰曹大司馬之勇賁育弗如也

博物志曰太公望為灌壇令文王夢見婦人當道哭問

其故曰吾太山之神嫁為西海婦灌壇令當吾道夢見
召太公三日果疾風暴雨文王乃拜太公為大司馬

班彪上事曰元狩六年罷太尉置司馬時議以北軍中候
有千人司馬故加大司馬所以別大小司馬之號也

三公府掾屬

太尉長史

應劭漢官儀曰太尉司徒司空長史秩比千石號為毗
佐三台助和鼎味

太尉掾

汝南先賢傳曰鄧盛字伯真蒼梧人為太尉諸曹掾彭城相左尚以贓罪三府掾屬拷驗踰科不竟更選盛覆拷盛到獄洗沐尚解械賜席乃謂尚曰君受國重恩而所坐事理如此今遇君子不可以小人道相持尚感盛至意對曰今使君相於如此尚獨何心敢不以死相歸乎即引筆具對

衛玠別傳曰玠字叔寶陳留阮千里有令聞當年太尉

王君見而問曰老莊與聖教同異阮曰將無同太尉善其言而辟之為掾世號曰三語掾君見而嘲之曰一言可辟何假三阮曰苟是天下民望可無言而辟復何假於一言

崔寔政論曰且三公天子之股肱掾屬則三公之喉舌天子當恭己南面三公亦委策掾屬以荅天子

太子從事中郎

後魏書曰郭景尚字思和涉歷書傳遷太尉從事中郎

善事權寵世呼為郭尖

干寶司徒議曰從事中郎之職各掌其所治之曹而紀綱其事體參輔謀議

太尉主簿

後魏書曰元慶智性貪鄙為太尉主簿事無大小得物然後判為十錢二十錢得便取之府中號曰十錢主簿廣州先賢傳曰鄧盛字伯直為秭歸令聞母病解印綬決去太尉司馬公嘉其所履服竟辟之初入府為主簿

司徒長史

東觀漢記曰吳梁為司徒長史以清白方正稱

干寶晉記曰傅咸為司徒長史多所執正

齊書劉撟為司徒左長史宋世與上數遊會撟同宋明
帝射雉郊野渴倦撟得旱青瓜與上對剖食之上懷其
舊德意眇良厚至是一歲三遷

梁書曰褚球字仲寶為司徒左長史加貂自球始也

干寶司徒儀曰左長史職掌檢其法憲明其分職

司徒掾

漢書曰武帝時司徒奏州郡農桑未有賞罰宜遣掾屬
循行詔遂使司徒督察州郡播植有所循者增掾屬十
人

謝承後漢書曰虞延辟司徒侯霸府掾正旦百官賀朝
上望見延在公府掾屬中馳小黄門問曰故陳留督郵
虞延非耶對曰是遂前召見

漢祿事曰陳寵為司徒掾先是公府掾多不親事但以

交接為務寵常獨親事

魏書曰王粲字仲宣年十八司徒掾辟遷黃門不就
晉書曰魏舒為司徒時陳留周震累為諸府所辟辟書
既下公輒喪亡僉號震曰殺公掾莫有辟者舒固辟之
而竟無患識者以此稱其達命

又曰周馥遷司徒左曹掾司徒王渾奏曰馥理識清敏
有才幹主定九品檢括精詳臣委任責成褒貶允當請
補尚書郎許之

干寶司徒儀曰掾屬之職敦明教義肅勵清風非禮不言非法不行以訓群吏以貴朝望各掌其所治之曹

鍾離意別傳曰司徒侯霸辟意署議曹掾以詔書送徒三百餘人到河北遭隆冬盛寒徒衣被單手足不能復行到弘農縣使令出見錢為徒作襦袴令曰不被詔意曰使者奉詔命寧私行耶出錢便上尚書使者意當上之光武皇帝得上狀見霸曰所使掾何仁恕為國用心乎誠良吏也

司徒屬

東觀漢記曰司徒侯霸辟閔仲叔到與相見勞問之不及政事仲叔曰始被明公辟且喜且懼及奉見明公喜懼皆去所望明公問屬何以為政美俗成化以仲叔為不足耶不當辟也如以為任用而不使陳之則為失人是以喜懼皆去便辭而出

晉中興書曰殷融字宏遠司徒王導以為右西屬融飲酒善舞終日笑詠未嘗以事務自嬰導甚相親悅焉

司徒從事中郎

晉中興書曰潁川荀組字大章司徒王渾表曰左西屬組文義貞素清識見稱宜轉中郎

陶氏家傳曰廋字恭淵為大司徒王導從事中郎為人正直不撓導亦以此重焉每言曰中郎有輔佑之才真國器也

司徒諮議參軍

晉中興書曰廬江何充字次道為司徒王導諮議參軍

後魏書曰李絲為主客郎齊文襄王攝選以絲為司徒
諮議參軍因謂之曰自郎署此所謂不次以卿人才故
有此舉耳

司徒主簿

三國典畧曰齊許惇護之子也性識敏速達於從政嘗
為司徒主簿以能判時人號為人鐵主簿

司空掾

魏志曰國淵字子尼太祖辟為司空掾屬每於公朝議

論常直言正色退無私焉

又曰太祖為司空丞相毛玠嘗為東曹掾與崔琰並為
選舉其所舉用皆清正之士雖時有盛名而行不由本
者皆莫得進務以儉率人由是天下之士莫不以廉節
自勵雖貴寵之臣輿服不敢過度太祖嘆曰用人如此
天下自治吾復何憂哉

太平御覽卷二百九

欽定四庫全書

太平御覽卷二百十

宋 李昉等 撰

職官部八

錄尚書

尚書令

錄尚書

漢書曰張安世領尚書事職典樞機以謹慎周密自著
每言大政已決輒移病出門有詔令乃驚使吏之丞相

府問馬自朝廷大臣莫知其與議也

又曰孔光字子夏領尚書事凡典樞機十餘年守法度
修政事不希苟合或問溫室省中樹皆何木也光荅以
他語其慎密也如此

應劭漢官儀章帝詔曰司空牟融典職六年勤勞不息
以融為太尉錄尚書事

又和帝策書曰故太尉鄧彪元公之族三讓彌高海內
歸仁為群賢首以彪為太傅錄尚書事百官總已以聽

又曰靈帝策書曰故太尉陳蕃忠亮謇諤有不吐茹之節司徒胡廣敦德允正五世從政今以蕃為太傅與庶參錄尚書事

又曰冲帝策書曰太尉趙峻二世掌典機衡有匪石不二之心大司農李固公侯之苗忠直不回今以峻為太傅因為太尉參錄尚書事

晉書曰元康元年誅楊駿詔曰司徒王渾秉德中正器量宏遠歷位内外文武勲庸著在方策宜參弼機衡以

亮天工其令錄尚書事

又曰賈充為太尉錄尚書事及征吳為大都督吳平遣
侍中程咸犒勞增邑八千戶

又曰會稽王道子元顯並錄尚書事時道子為東錄元
顯為西錄

晉中興書曰泰和元年詔會稽王體道冲虛理識明允
阿衡李文有保久之規輔弼哀皇盡翼亮之道朕承洪
緒仍聞善誘慎徽五教儀形具瞻登賢顯親國之典也

其以為丞相錄尚書事入朝不趨贊拜不名劍履上殿
給羽葆鼓吹班劍六十人

又曰元興元年八月庚子尚書下舍火是時桓元用事
出鎮姑熟身雖在外實遥錄尚書故天火示不復用也
又曰明帝后庾氏為太皇后九月癸卯皇太后臨朝稱
制司徒王導錄尚書事

傳咸晉故事曰何劭王戎張華裴楷楊濟和嶠為愍懷
太傅通省尚書事張華為光祿大夫尚書七條事皆諮而

後行惠帝之世太保衛瓘太宰河間王顥太傅東海王
越皆錄三省尚書事

沈約宋書曰高武帝永初三年尚書令揚州刺史徐羨
之為司空錄尚書事

又曰孝武帝即位以大將軍江夏王義恭為太尉錄尚
書事

又曰諸公錄尚書事古制也王肅解尚書納于大麓曰
堯納舜於尊顯之官使之錄萬機之政按漢氏諸吏平

尚書奏事後霍光以大司馬大將軍平尚書事

齊書曰明帝為宣城王錄尚書事廢帝昭業思蒸魚大
官以無錄公命不與

後魏書曰北海王祥初遷大將軍錄尚書事祥受命其
夜暴風雲電拔其庭中桐樹大十圍倒立本處天威如
此識者知其不終

三國典略曰齊以并省尚書令高阿那肱為錄尚書事
那肱才伎庸劣不涉文史尚書郎中源師常白那肱云

龍見當雲那肱問曰何處龍見作何顏色師答曰此是龍星須雲祭也非是真有龍見那肱曰漢兒多事強知星宿

唐書官品志曰錄尚書一人位在令上掌與令同但不糾察今則糾彈禁事與御史中丞更相廉察

陶氏職官要錄曰後漢章帝以太傅趙喜太尉牟融並錄尚書事尚書有錄名自此始也因是以來每帝幼即位輒置太傅錄尚書事

尚書令

六典曰尚書令掌總領百官儀刑端揆其屬有六尚書
一曰吏部二曰戶部三曰禮部四曰兵部五曰刑部六
曰工部凡庶務皆會而決之

漢官儀曰尚書令主贊奏總典綱紀無所不統秩千石
故公為之者朝會不階奏事增秩二千石天子所服五
時衣賜尚書令其三公列卿將大夫五營校尉行于中
道遇尚書令僕射左右丞皆迴車預避衛士傳不得紆

臺官臺官過乃得去

漢書曰張安世字子騁少以父任為郎用善事給事尚書精力於職休沐嘗出上行幸河東失書三篋詔問莫能對唯安世識之具陳其事後構求得書以相校無所遺失上竒其才擢為尚書令

東觀漢記曰陳忠為尚書令數進忠言辭旨宏麗前後所奏悉條於官上閣以為故事

又曰侯霸為尚書令深見任用樊准為尚書令明目漢

家故事周密畏慎申屠剛為尚書令蹇蹇多直言無所
屈撓

後漢書曰宋均拜尚書令每有駁議多合上旨均嘗刪剪
疑事帝以為有奸大怒收郎縛格之諸尚書惶恐皆叩頭
謝罪均顧厲色曰蓋忠臣執義無有二心若畏威失正均
雖死不易小黃門在傍入具以聞帝善其不撓即令貸郎
又曰申屠剛遷尚書令光武嘗欲出遊剛以隴蜀未平
不宜晏安逸豫諫不見聽遂以頭觸乘輿輪帝遂為止

又曰郭賀字喬卿為尚書令百姓歌之曰厥德仁明郭喬卿忠正朝廷上下平

又曰侯霸拜尚書令條選善政有便於民者除其煩苛時令立春下寬大詔書由霸始建言多施用

又曰陳蕃出為豫章太守性方峻不接賓客徵為尚書令送者不出郭門

華嶠後漢書曰申屠剛為尚書令時內外羣臣多是帝自遷舉加以法理嚴察職事過苦尚書近臣乃至捶撲

牽曳於前群臣不敢言惟剛每極諫

張璠漢記曰左雄為尚書令在位者各肅清時稱左伯
豪為尚書令天下皆慎選舉伯豪雄字也

漢書曰尚書令秦官銅印墨綬司隸校尉御史中丞皆
獨席坐京師號曰三獨坐言其尊重如此

魏志曰陳矯字季弼為尚書令魏明帝卒至尚書門矯
跪問何之帝曰欲案行文書耳矯對曰此臣職分非陛
下所宜臨也若不稱則請就黜帝便回車

又曰荀彧字文若為尚書令常以書陳事臨薨皆焚毀
故竒策密謀不得盡聞又非正道不用心名重天下莫
不以為儀表海內英俊咸宗焉

魏志春秋曰荀攸字公達為尚書令從太祖征伐常謀
謨帷幄時人及子弟莫知其所言太祖每稱之曰公達
外愚內智外怯內勇外弱內強不伐善無施勞智可及
愚不可及雖顏回甯武子不能過文帝在東宮太祖謂
曰荀公達人之師表也汝當盡禮敬之攸嘗病世子問

疾獨拜床下其見尊異如此初攸入尚書太祖聞名與語大悅謂荀彧鍾繇曰公達非常人也吾得與之計事天下尚何憂哉

蜀志曰費禕代蔣琬為尚書令于時戰爭多事衆務煩猥禕識悟過人每省讀書記粗舉目暫視究其意旨其敏速倍於人終亦不忘常以朝晡聽事其間接賓客飲食嬉戲加之博奕每盡人之歡後遷大將軍錄尚書事董允代禕為尚書令旬日之中事多停滯允歎曰人才

力相懸若此非吾所及

又曰蔣琬字公琰諸葛亮每言公琰託志忠雅當與公
讚王業可也密表後主臣若不幸後事宜以付琬亮卒
琬為尚書令時新喪元帥遠近危悚琬出類拔萃處群
僚之右既無戚容又無喜色神宇舉止有如平常由是
衆望漸服

又曰劉巴字子初代法正為尚書令躬履清儉不治產
業又自以歸附非素懼見猜嫌恭默守靖退無私交非

公事不言

又曰董允字季陽為尚書令庶事無留門無停賓又歷
職內外治身儉約謙靖少言為政不煩號為清能然持
法刻深好用文俗吏故居大官名聲損於郡縣時

晉書曰樂廣為尚書令所在當時功譽爛然為後人所
思

又曰裴秀為尚書令秀創制朝儀廣陳刑政朝廷多遵
用之以為故事在位四載為當世名公

又曰李允為尚書令雖歷職內外而在公退食在家貧
儉兒病無以市藥上賜錢十萬

又曰荀勗守尚書令課試令史以下覈其才能有闕於
文法不能決疑處事者即時遣出帝嘗謂曰魏武帝言
荀文若之進善不進不止荀公達之退不肖不退不休
二令君之美亦望於君也

又曰會稽王道子嘗集朝士置酒於東府尚書令謝石
因醉為委巷之歌王恭正色曰居端右之重集藩王之

第而肆淫聲欲令羣下何以取則石深銜之

又曰王彪之字叔虎為尚書令與謝安共掌朝政安每稱曰朝之大事衆不能決者諮之王公無不得判

又曰大熙元年詔曰夫總百揆得失管王政之開塞者端右之職也是以自漢代以來每選此官必慎其人議郎王戎可為尚書令

又曰衛瓘字伯玉拜尚書令性嚴整以法御下待參佐尚書郎若掾焉

又曰熊遠啓曰伏見吏部以太尉荀組為尚書令復領
荊州牧自三代以來未聞以納言之官而出領牧伯者
晉中興書曰卞壺為尚書令司徒王導稱疾不朝壺奏
導專任不敬事寢不行舉朝憚壺

又曰萬協遷尚書令詔曰尚書令協抗志高亮才鑒博
雅朕甚嘉之

晉書曰百官表注尚書令一人唐虞官也是謂文昌天
府銅印墨綬五時朝服納言憤進賢兩梁冠佩水蒼玉

官品第三俸月四十五斛領都總攝諸曹出納王命
晉公卿禮秩曰尚書令拜受命皆策命薨則於朝堂發
哀古之冢宰以在端右故也

晉故事曰賈充為尚書令以目疾表置省事於是遂置
省事吏四人品職章服與諸曹令史同

宋書曰王僧虔為尚書令嘗為飛白書題尚書壁曰圓
行方正物之定質循之不已則溢高之不已則躓引之
不已則遺是故去之宜疾當時嗟賞以比座右銘

又曰武帝踐祚王瑩遷尚書令時有猛獸入郭上意不
悅以問群臣皆莫能對瑩在御筵乃斂板荅曰昔擊石
拊石百獸率舞陛下應錄御圖武象來格帝大悅衆咸
服焉

齊書曰謝朓字敬冲徵為司徒尚書令朓辭脚疾不堪
謁仍角巾肩輿詣雲龍門謝既見乘小車就席

齊職儀曰秦漢之世委政公卿尚書之職掌印奏令贊
文書僕射主開閉令不在則僕射奏下其事魏氏重內

職八座尚書任同六卿舜舉八元八愷以隆唐朝今號八座為元愷謂賢能用事義如昔也

梁書曰何敬容為尚書令貪吝為時所嗤鄙其署名敬字則大作苟小為文容字大為文小為口陸倕戲之曰公家苟既竒大文亦不小敬容遂不能荅又日漏禁中語故嘲謂日至嘗有容姓吉問卿與郗吉遠近曰如明公之與蕭何

唐書曰太宗在藩嘗為尚書令其後人臣莫敢為遂廢

其官廣德元年冬代宗以親賢有大勲遂特拜為尚書令

又曰廣德二年冬詔郭子儀於尚書省事尚書令事命宰臣以下特遣射生五百騎執戟翼從自朝堂至於省賜以教坊音樂

五代史梁書開平三年詔外尚書令為正一品按唐典尚書令正二品至是以將授趙王鎰此官故外之

會稽先賢傳曰沈勳徽詣南宮賜酒拜尚書令持節臨

辟雍名冠百寮

襄陽耆舊傳曰劉季和曰荀令君至人家坐處三日香
徐廣軍服儀制曰尚書令軺車黑耳後戶

通典曰大唐尚書令朝服鷩冕八旒七章三梁冠

鷩雉也其

毛可為冠也

武德初太宗為秦王時嘗居之其後人臣莫敢

當故自龍朔二年制廢尚書令

又曰舊尚書令有大廳當自之中今謂之都堂

世說曰崇禮闈在東掖門內路西即尚書省崇禮門東

建禮門內即是尚書令下舍之門

太平御覽卷二百十